

**Date – 11/11/2025**  
**Time - 7:30 -7:40 Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Dampa bial bye election vote thlak hun chu tukin dar 7 atang khan hawn tan a ni.**
- 2. Kum 2025-26 atan Mizorama sawrkar primary school leh middle school zirlai 1,29,285 hnenah chaw chhun, midday meal (PM-POSHAN) sem a ni.**
- 3. Bihar Assembly inthlan thawhnhina atan tukin dar 7 atang han vote thlak tan a ni.**
- 4. Nizana New Delhi-a Lal Quila Metro Station bula car puakah mi 8 aia tlem lo an thi.**

<><><>

**DAMPA GOES TO POLL**

**Dampa bial bye election vote thlak hun chu tukin dar 7 atang khan hawn tan a ni a, mipui ten tluang taka vote an thlak theih nan ruahmanna engkim peihfel a ni,**

**Nimin khan Mamit Election Officer Pu Lalnunfela Chawngthu chuan Dampa bial bye election lo awm tur a inthlan buaipuitu tur polling party ten thlen kim tawh thu sawiin a thleng hnunung ber te hi Zopui polling station a duty turte niin nimin lamah ke in Zopui khua hi an pan tih a sawi a.**

**Mamit Election Officer chuan zing dar 7 atangin tlai dar 4 thleng vote thlak tur a ni a, hemi zawh ve leh hian polling party te chuan Mamit DC office lam an rawn pan nghal ang a ti a, an lo thlen ve leh an bungrua te chu strong room ah dahluh a, november ni 14 vote chhiar hma chu venhimna khauh tak hnuaiah dah that an ni dawn a ni a ti.**

**Hetih lai hian Dampa bial bye election security nodal officer, Mamit Addl SP Pu Lalchhuanawma Chhangte pawhin Dampa bial bye election chu boruak muanawm leh fel fai taka an neih theih a beisei thu a sawi a, venhimna an uluk thu sawiin Dampa bial bye election atan hian Mizoram Police nasa takin an inpuahchah a, boruak ralmuang tak a mipui ten vote an thlak theih nan polling station tinah police an duty a, boruak duhawm lo thleng thei veng turin sector police officer te, flying squad te, Static surveillance team te, Naka check post te leh QRT te an indah thu a sawi bawk.**

Puan tawh angin, Dampa Bial Bye Election ah hian candidate 5 an awm a, BJP Party hian kum 2023 a he lai biala Congress candidate, tunhnai a an party zawmtu Pu Lalhmingthanga chu an vawrh chhuak a, Congress in Minister hlui Pu John Rotluangliana an dah a. MNF chuan an party senior vice president leh Minister hlui Dr. R. Lalthangliana dintirin ZPM atangin kum 2023 inthlana an din tir Pu Vanlalsailova an din nawn tir leh bawk a. PC Party chuan an party Vice President Pu K. Zahmingthanga an dah bawk a ni.

Dampa assembly bial bye-election a tul chhan chu July ni 21-a helai bialtu MLA Pu Lalrintluanga Sailo MNF a thih vang a ni.

Dampa Bialah hian vote thlakna hmun (polling station) 1,276 a awm a, Dampa Bial chungmi vote nei mipa 10,605 leh hmeichhia 10,185 bakah, sorkar hnathawk (service voter) mipa 111 leh hmeichhia 4 an awm a; vote nei zawng zawng hi an vaiin mi 20,905 niin, mipa 10,716 leh hmeichhia 10,189 an ni.

<><><>

## TOURISM

New Delhi-a cham mek Minister of State, Tourism Department Pu Lalnginglova Hmar leh NITI Aayog Member Dr. VK Paul te chu nimin khan New Delhi-a NITI Aayog Headquarters-ah an inkawm a,

Mizoram tourism hmasawna'na NITI Aayog leh Mizoram sawrkar hmalakna tur sawiho zingah Mizoram Tourism Conclave buatsaih a tel a. Stakeholder tam zawk an tel theihna tur leh, Mizoramin a hlawkpui theih tura ruahmanna siam nise tih a ni. Hemi chungchang bika hmalatu tur 'Task Force' din a, a ranglama a hun tihchian theih nise tiin rel a ni. New Delhi-a 'Mizo Day' hman chungchang sawiho a ni bawk.

NITI Aayog leh Mizoram sawrkar tangkawp chuan November 24 ah Mizoram sawhthing tharchhuah chungchanga inrawnkhawmna, 'Stakeholder Consultation on Ginger Produce for Mizoram' tih chu New Delhi-ah neih a ni dawn a. He hun hi Mizoram Chief Minister Pu Lalduhoma'n a telpui dawn a, sawrkar official bakah industry, zirna in leh organisation tam thei ang sawm an nih tur thu meeting-ah tarlan a ni. Hemi zulzuia sector dang - a bikin tourism - a programme siam chungchang ngaihtuah ho a ni bawk.

Hetihlai hian, Tourism department in Mizorama tourist service provider-te hnen atanga khualzin awm zat an chhinchhiah danin kumin August leh September thla chhung khan Mizoramah khualzin 1,27,458 an awm.

Tourism department hotute sawi danin, August leh September thla chhunga Mizorama khualzin rawn lutte hi ram dang mi, foreigner 2,208 leh India khua leh tui (domestic tourist) mi 1,25,250 an ni a; Aizawl district-in khualzin dawng tam berin mi 75,461 a dawng a ni.

Kan corr report lo ngaithla ang.

*(Voice Cast - Tourism department hotute chuan tourist rawn lut zat hi hotel leh a kaihnhawih khualzinte thlenna hmun te, khualzinnte hmun tlawh thin te leh Mizoram luh leh chhuahna hmun hrang hrang atanga lakkhawm a nih rualin, heng hmun hrang hrangte hian khualzin an dawnawm zat hi thla tin an thelloh loh thin avangin khualzin rawn lut zat hi tuna data an neih mek ai hian a tam*

*zawk an rin thu an sawi a; hotel leh a kaihnawih 128 atangin September thla khan data an lakkhawm laiin August thla hotel leh a kaihnawih 135 atangin data an nei thung a, hei vang hian September thla aiin August thlaah khualzin rawn lut zat an chhinchhiah tam zawk thu an sawi. Khualzinte pan thin hmun hrang hrangte hian Tourism department-ah tha takin data pe thei thin se an duh thu an sawi bawk a ni - Johny Lalrinchhana, Akashvani News Aizawl)*

<><><>

## **PM POSHAN**

**Kum 2025-26 atan Mizorama sawrkar primary school leh middle school zirlai 1,29,285 hnenah chaw chhun, midday meal (PM-POSHAN) sem a ni.**

School Education department hnuaiia PM-POSHAN hotute hnen atanga Akashvani News Aizawl thudawn danin, sawrkar kum kal mekah hian Mizoram sawrkar hnuaiia sikul 2,507-a zirlai 1,29,285 hnenah chaw chhun sem a ni a, Pre-Primary School zirlai 22,960, Primary School zirlai 70,017 leh Middle School zirlai 36,308 an ni. Central-in a ruahman ang chuan chaw chhunah hian Primary School zirlai naupang pakhat tan ni khatah Rs 6 point 11 leh Middle School zirlai naupang pakhat tan Rs 8 point 35 zel dah a ni a, an chawmh meh turte hi Dietitian-te'n an ruahman thin a ni.

Sawrkar laipui chuan eisiamtute hlawh tur first instalment a rawn pek tawh thu PM-POSHAN hotute chuan an sawi a, first instalment hian April - June thla hlawh pek an ni a. Sawrkar laipui hian Mizoram sawrkar hnenah second instalment tur a rawn pe tawh a, tunah hian state sawrkar kutah la awmin, state sawrkarin a pek chhuah veleh eisiamtute hlawh hi pek chhunzawm theih a nih dawn thu an sawi.

Buhfai leina, phurhna leh a kaihnawih thil dang chu central-in za-a za a rawn tum a, chawmh meh man leh cook-cum-helper hlawhte chu central leh state sawrkarin an intum sem thung tih an sawi bawk.

**Kan corr report lo ngaithla ang.**

*(Voice Cast - PM-POSHAN hotute chuan sawrkar laipuiin second instalment tur sum chu Mizoram sawrkar hnenah an pe tawh a, mahse, Mizoram sawrkarin ala pek chhuah loh avangin eisiamtute hlawh tur hi kumin June thla thleng chauh an la pek thu leh chawmh meh man pawh kumin May thla thleng an sawi. Sawrkarah file an thehluh tawh thu sawiin PM-POSHAN hotute chuan, chhanna erawh an la dawn loh thu an sawi a, second instalment-a sum awm atang hian eisiamtute hlawh tur leh chawmh meh man an pek hmabakte pek tur a nih rualin, engtik thla thleng nge pek theih a nih dawn an la hriat loh thu an sawi bawk. - Johny Lalrinchhana, Akashvani News Aizawl)*

<><><>

## **URBAN MOBILITY INDIA- SPECIAL AWARD**

**Mizoramah lirthei khalhtuten dan an zawm that avang leh traffic buailo thei ang bera lirthei khalh an chin avangin, 18th Urban Mobility India 2025 Gurugram, Haryana a neih ah Mizoram state chuan Special Award a dawng a,**

**Mizoram Traffic Management System Special Award hi Union Minister Manohar Lal leh Union Minister of State Tokhan Sahu, ten d' an hlan a.**

Mizoram sawrkar aiawh in UD&PA Secy Pu Lalmalsawma Pachuau leh a thawhpuiten an dawng a ni.

Urban Mobility India Conference hi Ministry of Housing & Urban Affairs hnuai Institute of Urban Transport(India) in kum tin huaihawt thin a ni a, He Award dawng tur hian Award Selection Committee-in presentation nei tura a hriattir ang in, Town & Country Planning Wing, UD & PA Deptt chuan Video Presentation bakah PowerPoint Presentation an pe a. Mizoram ah traffic rules tha taka zawm a nih dan te, mipuiin dawh thei taka traffic buai nuai nuai lova an tlan thin dan te, tul lo ah horn hmehrik a nih ngai loh dan te tarlan niin Aizawl chu Silent City tia sawi thin a nih thu te tarlan a ni bawk.

He an Presentation pek zulzui hian Award Selection Committee chuan Central Ministry ah recommendation pe in Mizoram Sorkar aiawhin UD & PA Department a hotuten an dawng a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BIHAR ELECTION

Bihar Assembly inthlan thawhnhnihna atan tukin dar 7 atang han vote thlak tan a ni. Inthlan thawhnhnihnaah hian district 20 huamchhunga Assembly bial 122 ah vote thlak a ni dawn a. Voter vaibelchhe 3 leh nuai 70 chuanguin an aiawha rorel tur an thlang dawn a. Candidate hi an vaiin 1302 awmin an zingah hian hmeichhia 136 an tel a. Zing dar 7 atangin vote thlak tan a ni ang a, tlai dar 6 thleng vote thlakna hun hawn a ni a. Assembly bial 7 bikah chuan tlai dar 5 ah vote thlak hun khar a ni ang. Polling station 595 chu hmeichhiate vil tur bika ruahman a ni a. Polling booth 21 chu pianphunga rualbanlote enkawl tura dah a ni bawk a. Model Polling station hi 316 siam a ni. Tun tum inthlanah hian candidate langsar zingah Chief Minister Nitish Kumar te, JD(U) hruaitu hlun leh State Power Minister nilai Bijendra Prasad Yadav te an tel a. Bihar Assembly inthlan vote tla te hi tun thla ni 14 ah chhiar a ni ang.

<><><>

NEW DELHI

Nizana New Delhi-a Lal Quila Metro Station bula car puakah mi 8 aia tlem lo an thi. Delhi Police Commissioner Satish Golcha sawi danin nizan dar 6:32 khan lirthei pakhat muangchanga red light-a a din hnu lawkah a puak zui nghal a. Hei hian a bul vela lirthei nasa takin a ti chhe bawk a. Hliam tuar engemawzat an awm bawk niin a sawi.

Prime Minister Narendra Modia chuan chhijatna thlen dan te a enfiah nghal a. Union Home Minister Amit Shah a biak nghal thu leh thil thleng chu chhuui zui nghal dan tur an sawi nghal a ni.

**Hetihlai hian Union Home Minister chuan Delhi Police Commissioner, NIA DG leh Intelligence Bureau Director te a be nghal a. NSG, NIA leh Forensic Department te a hmunah a tir nghal bawk a ni.**

<><><>